

**STATUTS**  
**DALLA**  
**SECZIUN DA CATSCHADURS**  
**VALLATSCHA**

commembra dall'uniun cantunala dils catschadurs da patentia (BKPJV)



**MEDEL / LUCMAGN**

**2014**

## I NUM E DOMICIL

### Art. 1

<sup>1</sup> Sut il num "Secziun da catschadurs Vallatscha" exista tenor art. 60 ff dil cudisch civil svizzer ina secziun da catschadurs dalla vischnaunca Medel/Lucmagn. Il num commember vala per la schlatteina masculina e feminina. Il num Uniun cantunala Grischuna dils catschadurs da patentia vegn scursanius cun BKPJV.

## II. INTENT E FINAMIRA

### Art. 2

La secziun Vallatscha ha per finamira da formar ses commembers e promover in bien spért cun tgirar ils interess dils catschadurs, e quei entras:

- a) mantener la basa per ina sauna catscha da patentia en nies cantun.
- b) ina buna tgira e bien quitau per ils animals selvadis, en special cun defender e proteger il spazi vital per nossas selvaschinas.
- c) ina catscha commensurada duei il diember dallas selvaschinas restar sauns ed adattaus al spazi da viver local.
- d) perseguitar e sefatschentar spirontamein cun fatgs e politica da catscha ed esser neutrals en fatgs da partidas politicas e confessionalas.

## III. COMMEMBERS

### Art. 3 Commembradi ella BKPJV

La secziun ei commembra dalla BKPJV e dil district I da catscha Cadi.

### Art. 4 Mieds

<sup>1</sup> Per vegnir suentar allas obligaziuns dalla secziun ha quella a disposiziun las contribuziuns dils commembers, las qualas vegnan fixadas mintg'onn a caschun dalla radunonza generala.

<sup>2</sup> Liberai dallas contribuziuns annualas ein commembers libers e candidats.

<sup>3</sup> Las contribuziuns sebasan sin il regulativ da salarisaziun dalla secziun.

## Art. 5 Commembradi

<sup>1</sup> Commembers activs (commembers- A, commembers- B, commembers libers e candidats) ein personas naturalas (adm. giur). Commembers passivs e donaturs dalla secziun ein personas naturalas (adm. giur) e personas giuridicas. La secziun differenziescha suandonts commembradis:

### Commembers- A

Ils commembers-A ein legitimai da votar en tuttas fatschentas e vegnir elegi en mintga funcziun. Els han d'ademplier las obligaziuns finanzialas enviars la secziun e la BKPJV. Commember- A sa mintg'in che posseda la lubientscha d'exequir la catscha el cantun Grischun daventar. Leutier vala era la surveglionza da catscha dil cantun Grischun. Mintga commember duei segidar en tuts graus tenor meglia saver e puder.

### Commembers- B

Commembers- B ein quels che figureschan gia en in'otra secziun dalla BKPJV sco commember – A. Els ein obligai a tuttas contribuziuns tenor il regulativ da salarisziun. En fatgs interns dalla secziun ein els legitimai da votar e da vegnir elegi en funcziuns. Els ein denton buca legitimai da votar en fatgs, e vegnir elegi en funcziuns dalla BKPJV.

### Commembers libers

Ils commembers che festiveschan egl onn current il 75-avel natalezi ed ein stai silmeins ils davos 25 onns nuninterrutamein commember –A en ina secziun dalla BKPJV daventan commembers libers. Per quels commembers ei la secziun buca pli obligada da pagar la contribuziun alla BKPJV. Els ein deliberai dalla contribuziun annuala dalla secziun. Ultra da quei gaudan els tuts dretgs ed obligaziuns sco ils commembers- A.

### Candidats

Persunas ch'ei s'annunziadas el cantun Grischun per igl examen da catscha san vegnir recepidas en la secziun sco candidats. Els ein buca legitimai da votar, e vegnir elegi en funcziuns. Per els paga la secziun negina contribuziun alla BKPJV. Els candidats pagan negina contribuziun annuala alla secziun. Aschi spert sco els obtengan la lubientscha d'exequir la catscha el cantun Grischun valan els sco commembers –A.

### Commembers passivs ni donaturs

La secziun sa recepir commembers ni donaturs che possedan negina lubientscha d'exequir la catscha el cantun Grischun. Els ein buca legitimai da votar en fatgs e vegnir elegi en funcziuns dalla BKPJV. La gasetta "Catschadur Grischun" san els abbonar entras la secziun.

## Art. 6 Recepciun da commembers

<sup>1</sup> La damonda da daventar commember dalla secziun ei da drizzar a scret al president cun indicar las personalias. Sur il recepir ni renviar in commember decida la secziun cun maun pli a caschun dalla radunonza generala.

<sup>2</sup> Encunter la refusada d'in commember- A sa tal recuorer a scret tier la suprastonza centrala slargada dalla BKPJV enteifer 30 dis. La suprastonza centrala slargada decida definitivamein.

<sup>3</sup> La persuna che vul daventar commembra dalla secziun astga buca esser presenta alla radunonza nua ch'ei vegn votau sur da sia recepciun.

## Art. 7 Extrada da commembers

<sup>1</sup> L'extrada ord la secziun ei da drizzar a scret al president sil pli tard 4 jamnas avon la radunonza generala. Il commembradi extingua era cun la mort.

<sup>2</sup> Cun l'extrada sco commember van tut ils dretgs visavi la secziun e sia facultad a piarder. Per igl onn current eis el denton aunc obligaus d'ademplier las obligaziuns finanzialas enviers la secziun.

## Art. 8 Exclusiun da commembers

<sup>1</sup> Commembers che cunterfan als interess dalla secziun e sesutamettan buc allas ordinaziuns san vegnir excluds dalla secziun a caschun d'ina radunonza generala cun maun pli.

<sup>2</sup> Cun l'exclusiun d'in commember piarda quel tuts dretgs e regress enviers la secziun e sia facultad.

<sup>3</sup> Encunter l'exclusiun sa il pertuccau recuorer a scret enteifer 30 dis tier la suprastanza centrala slargada dalla BKPJV. Quella decida definitivamein.

## Art. 9 Commembers d'honor dalla secziun Vallatscha

<sup>1</sup> Commember d'honor sa ina persuna ch'ei sefatga grondamein meriteivla per la secziun ni en fatgs da catscha vegnir numnada sin proposta dalla suprastanza a caschun dalla radunonza generala.

<sup>2</sup> Ils commembers d'honor gaudan vinavon ils dretgs tenor art. 5. Els dueien vegnir undrai entras la surdada d'in present.

## Art. 10 Distincziun da commembers dalla secziun Vallatscha

<sup>1</sup> A personas che han prestau en ina sparta ni l'autra durant silmeins 10 onns ordvart bia lavur en favur dalla secziun (p.ex. sco suprastont, etc.), sa la suprastanza dalla secziun surdar in present sco reconuschiantscha.

<sup>2</sup> Commembers ch'ei in 20 onns ella secziun obtegnan ina regurdientscha

<sup>3</sup> Quellas distincziuns delibereschon buca dallas contribuziuns ed obligaziuns.

## Art. 11 Reverenza viers commembers defuncts dalla secziun Vallatscha

<sup>1</sup> Miera in commember sche cumpogna ina delegaziun dalla secziun el tier il davos ruaus. Enstagl da fluras sa era vegnir tarmess ina donaziun tenor giavisch dalla famiglia.

<sup>2</sup> Ei vegn schau leger ina sontga messa.

## Art. 12 Undrientschas dall'uniun cantunala dalla BKPJV

<sup>1</sup> Per commembers ch'ei sefatgs grondamein meriteivels enviers la BKPJV surdat lezza suandontas undrientschas:

- a) distincziun da meret (Verdienstauszeichnung)
- b) distincziun da tgira (Hegeauszeichnung)
- c) commember d'honor cantunal
- d) veteran cantunal

<sup>2</sup> Il modus per far diever dallas suranumnadas undrientschas per in commember ei prescerets els artechels 35, 36, 37 e 38 dils statuts dalla BKPJV.

## IV. ORGANISAZIUN

### Art. 13 Ils organs dalla secziun Vallatscha:

- a) la radunonza
- b) la suprastonza
- c) ils revisurs da quen

### Art. 14 La radunonza

<sup>1</sup> Il pli ault organ ei la radunonza dalla secziun. Ina radunonza regulara ha liug mintg'onn.

<sup>2</sup> La radunonza generala ha liug mintg'onn el meins avrel.

<sup>3</sup> Igl onn da fatschenta cuozza mintgamai naven digl 1. da schaner entochen ils 31 da december.

<sup>4</sup> La radunonza da tgira sa haver liug ensemen cun la radunonza generala.

<sup>5</sup> L'invitaziun alla radunonza cun la gliesta da tractandas ei da tarmetter a scret a scadin commember silmeins 8 dis avon la radunonza.

<sup>6</sup> Propostas da commembers per mauns dalla radunonza ein d'inoltrar a scret alla suprastonza silmeins 10 dis avon la radunonza.

<sup>7</sup> Sur da propostas che figureschan buca sin la gliesta da tractandas sa la radunonza prender decisiun mo sche 2/3 dils presents ein persunter.

### Tractandas dalla radunonza generala:

1. Appel ed elecziun dils dumbravuschs
2. Approbaziun dalla gliesta da tractandas
3. Approbaziun dil protocol
4. Rapport dil president
5. Rendaquen, rapport dils revisurs ed approbaziun dil quen
6. Fixaziun dallas contribuziuns annualas
7. Orientaziun ed approbaziun dil program da lavur
8. Recepziun da novs commembers e mutaziuns
9. Elecziuns per ina perioda d'uffeci da 3 onns:
  - dalla suprastonza
  - dils revisurs da quenEin durant ina perioda d'uffeci singuls posts d'aventai vacants, vegnan tals remplazzai a caschun dalla proxima radunonza per il temps da quella perioda d'uffeci che resta aunc.
10. Elecziuns per ina perioda d'uffeci dad 1 onn:
  - dils delegai per la radunonza da delegai dalla BKPJV
11. Honoraziuns
12. Orientaziuns
13. Varia

### Tractandas dalla radunonza da tgira:

1. Appel ed elecziun da dus dumbravuschs
2. Approbaziun dalla gliesta da tractandas
3. Approbaziun dil protocol
4. Rapport annual dil cau da tgira
5. Rendaquen, rapport dils revisurs ed approbaziun dil quen
6. Orientaziun ed approbaziun dil program da lavur
7. Varia

## Art. 15 Elecziuns e votaziuns

<sup>1</sup> Elecziuns vegnan da principi fatgas cun maun pli. Resalvadas ein las disposiziuns els artechels 23 e 24 da quests statuts. Elecziuns cun scrutini vegnan fatgas sin proposta dalla suprastanza ni sche 1/5 dils commembers presents pretendan quei.

<sup>2</sup> Tier elecziuns drova ei egl emprem scrutini igl absolut pli, el secund scrutini decida il relativ pli. Tier fatschentas materialas vegnan las votaziuns fatgas cun maun pli.

<sup>3</sup> Ein las parts ulivas vala il suandont:

- tier elecziuns decida la sort
- tier autras fatschentas decida il president

## Art. 16 Radunonzas extraordinarias

<sup>1</sup> Radunonzas extraordinarias san vegnir convocadas entras la suprastanza ni sin giavisch da silmeins 1/5 dils commembers.

<sup>2</sup> Concernent l'invitaziun valan las medemas determinaziuns sco art. 14 en quests statuts.

## Art. 17 La suprastanza

<sup>1</sup> La suprastanza secumpona dil:

- a) president
- b) actuar / vicepresident
- c) cassier
- d) cau da material
- e) cau da tgira / substiut cau da tgira

<sup>2</sup> Sco ulteriurs funcziunaris ageschan:

- a) 2 revisurs da quen
- b) responsabel da tir
- c) ustier
- d) webmaster

<sup>3</sup> La suprastanza ei igl organ executiv dalla secziun. Ella diregia tuttas fatschentas administrativas ed organisatoricas dalla secziun ed ei cumpetenta da decider sche silmeins 3 commembers ein presents.

<sup>4</sup> La suprastanza sa decider sur d'expensas entochen frs. 1'000.00 per onn. En caussas da tgira e per la cumpra da muniziun ein las cumpetenzas exclusivamein tier la suprastanza.

<sup>5</sup> La suprastanza, excepiu il president ed il cau da tgira, seconstituescha sesezza.

## Art. 18 La sutscriziun giuridica per la secziun Vallatscha han:

- a) en caussas d'administraziun: il president ensemen cun igl actuar
- b) en caussas finanzialas: il cassier ensemen cun il president
- c) en caussa da tgira: il cau da tgira ensemen cun il president

## Art. 19 Responsabladad

<sup>6</sup> Pils deivets dalla secziun ei sulettamein il capital dalla secziun responsabels. Ils commembers han negina responsabladad cun lur capital personal enviers la secziun.

## Art. 20 Pensums dalla suprastonza

<sup>1</sup> Il president survigilescha e coordinescha tuttas fatschentas dalla secziun. El meina las sesidas da suprastonza e las radunonzas, exequescha tut la correspondenza, procura pil rapport annual, survigilescha ils ulteriurs suprastonts e representa la secziun anoviars. Sche treis commembers dalla suprastonza pretendan ina sesida eis el obligaus da clamar ensemen la suprastonza.

<sup>2</sup> Igl actuar (vicepresident) redegia ils protocols da tut las radunonzas, sesidas da suprastonza ed autras sedutas. El duei era menar ina cuorta cronica dad occasiuns da pli gronda muntada. Plinavon segida el cul president e remplazza lez en cass d'absenza.

<sup>3</sup> Il cassier meina la cassa ed administrescha la facultad dalla secziun. El fa igl incasso dallas contribuziuns, tarmetta a temps las mutaziuns per la gliesta da commembers e fa giu quen cul cassier central. Plinavon meina el la gliesta da commembers. Ina gada ad onn avon la radunonza generala metta el a disposiziun il quen als revisurs.

<sup>4</sup> Il cau da material ei responsabels per in bien manteniment dils stabiliments sco era dil material e meina ina gliesta d'inventari da tut material inclusiv measas e preit da trofeas.

<sup>5</sup> Il cau da tgira / substitut cau da tgira ei responsabels per in cuntinuau menaschi da tgira pils animals selvadis conform al reglement da tgira cantunal dalla BKPJV ed al concept da tgira dil district da catscha I. En fatgs da tgira representa el la secziun anoviars.

## Art. 21 Ils revisurs da quen

<sup>1</sup> La radunonza elegia dus revisurs da quen. Ils revisurs controlleschan mintg'onn avon la radunonza generala e da tgira ils quens e rendan rapport allas radunonzas. Els han il dretg da controllar quens e protocols.

## Art. 22 Las contribuziuns

<sup>1</sup> Las contribuziuns dils commembers, sco era las pagas e spesas vegnan fixadas dalla radunonza generala sin proposta dalla suprastonza e fixadas en il reglement da salarisaziun.

## Art. 23 Revisiun dils statuts

<sup>1</sup> Ina revisiun parziala ni totala da quests statuts ei resalvada alla radunonza generala. Quella ei autorisada da decider sche tala ei publicada sin la gliesta da tractandas. Las midadas ston vegnir approbadas cun ina maioritad da silmeins 3/4 dallas vuschs dils commembers presents.

## Art. 24 Dissoluziun dalla secziun Vallatscha

<sup>1</sup> La dissoluziun dalla secziun sa succeder cun 2/3 dallas vuschs sche dapli che la mesadad dils commember ein presents.

<sup>2</sup> Prendan pli pauc che la mesadad da tut ils commembers part alla radunonza, eis ei da tener giu ina secunda radunonza enteifer in meins. A lezza radunonza sa la secziun vegnir dissoluziunada cun 2/3 dallas vuschs, sche pli paucs che la mesadad dils commembers prendan part a quella radunonza.

<sup>3</sup> Vegn ei enteifer 10 onns fundau negina secziun da catschadurs sil territori dalla secziun va la facultad vi alla BKPJV.

## Art. 25 Vigur legala

<sup>1</sup> Quests statuts ein vegni approbai dalla radunonza generala dils 12 d'avrel 2014 e remplazzan ils statuts dils 27 da schaner 2001. Els van en vigur sunter l'approbaziun entras la suprastonza cantunala centrala dalla BKPJV.

Per la secziun da catschadurs Vallatscha, ils 21.04.2014 :

Il president



Ursin Venzin

Igl actuar




Vital Lutz

Approbaziun entras la suprastonza centrala dall'Uniun da catschadurs da patentia (BKPJV),


ils 8.5.2014 :

Il president



Bear Angerer

Igl actuar



Gaudenz F. Domenig

Hannes Paurpan